

獨

學

廬

五

稿

獨學廬五稟卷三

吳縣石韞玉著

募開放生池疏

蓋聞天地之大德曰生好生惡殺天地之心也
凡世間含靈負性一切有情之物無不護其生
命是故君子仁民者必愛物見其生不忍見其
死孟子謂之仁術夫仁者斯人本然之性何以
謂之術哉蓋惻隱之心人皆有之然無術以行
之則不能及物故古之哲人推廣其心以為樂
善之助此放生之說所由昉也自唐宋以來放

生池之見于載籍者不可勝數今世名山大刹
亦往往有之吾蘇西山多禪室而吾與菴據支
硯之勝道場香潔僧徒嚴淨沈居士子益既募
衆力有大悲閣之建矣近日又議於閣之西面
隙地鑿池以為放生之所查西山待御首倡捐
施繼之者當集腋為裘以明善與人同之義夫
衆生在世原不能有生無滅然斯人愛物之心
必涵育培養使生生之機常留方寸之中壽算
可以延長子孫可以蕃衍其在書曰古先后方
懋厥德罔有天災山川鬼神亦莫不寧暨鳥獸

魚鱉咸若然則鳥獸魚鱉咸若固積德消災之一端雖古聖人不廢焉伏願善男信女共樂檀施助成斯舉諒亦仁人君子所樂從也謹疏

山東按察使張公家傳

公諱彤字虎拜號鄂樓湖州歸安人宋儒橫渠先生之後高祖廷霖官山東按察副使雍正初監督萬安倉以親老歸養時歸安烏程德清三邑秋糧特重於他邑因勾稽盈縮纂緝成書上諸兵部侍郎吳公乃得上

聞由是議減十分之二至今三邑之人頌之曾

祖亮官肇慶府通判權府事有政聲公生而穎異六歲就塾讀書十行俱下年十六入歸安縣學學業日進善書工詩明年入京肄業太學才名籍籍公卿間乾隆庚子甲辰高廟巡幸江浙公迎

鑾獻詩

名試皆名列乙等拜文綺之

賜丙午舉順天鄉試充景山官學教習期滿引見奉

旨以知縣用壬子四月雲南請揀發知縣四貢

公與其選遂需次于滇廕署宜良縣恩長縣元
江州昭通大關同知所至有聲乙卯春黔楚苗
變嘉勇郡王福康安率師征討聞公名檄入幕
府總理戎務與篆文小印一方凡一切文檄必
俟公檢校而後行敘勞升江西南安府同知
賞戴花翎以戎務方殷未及赴任尋升雲南大
理府嘉慶初雲南黑獍擾邊威勤公勒保奉
命往勦公復隨征其後威勤公移師平黃柏山
小竹山教匪征貴州狝苗生擒苗婦王囊仙苗
人韋七綰鬚等削平黔亂公皆在行間旋升貴

州糧道戊午正月抵任公以治戎出入深山窮
谷閒積受瘴癘霧露之氣至是疾作請歸調理
明年病痊入京恭逢

仁廟親政之初

召對稱

旨授江西糧道是秋復因病乞歸辛酉秋病痊
入京授刑部郎中未及赴任病復作告歸甲子
春起疾北上道出山東山東巡撫鐵保奏留補
登萊青道公在任安民戢暴清理庶務地方頻
有蝗災公建蝗神祠於萊州西郊春秋祈報歲

以為常自是蝗不為害續脩掖縣志又采錄掖
詩以備一方掌故累權臬篆治獄明允己巳秋
升山東按察使山東健訟成習公至庭無留獄
民亦以為不冤辛未公以父年八十力請歸養
壬申疾復作竟成黃疸之症遂不起予往時陳
臬山左與公同官且迭相交代知公最深公嚴
以律已寬以御衆以直道事上官以和衷處僚
吏其於地方不生事亦不廢事庶幾古之循吏
焉至其贊畫戎韜迎機導肯則聞諸戚勤公所
述皆克知灼見者也令子震以狀乞為家傳故

敘其生平本末附諸張氏家乘俾其後世子孫有所考焉

農部潘君家傳

君諱世璜字黼堂號理齋吳縣人榕臯先生之子也先世自唐時由閩遷歙之西篁墩宗族繁衍今歙人名其地曰潘村六世祖兆鼎官松陽教諭卒葬于吳之光福鎮子孫遂家於吳榕臯先生名奕雋乾隆己丑進士以內閣中書起家官至戶部貴州司主事其後於道光己丑重赴恩榮宴

詔加四品卿銜又以姪世恩馳封光祿大夫君
生時曾祖聞齋先生夢人送雲漢天章四字額
因命名世章後應試乃改今名幼承庭訓經明
行脩乾隆己酉舉於鄉乙卯成進士

殿試一甲第三人及第授編修習清書嘉慶元
年散館改部主事分發戶部行走三年丁母沈
宜人憂回籍維時榕皋先生已於乾隆戊申冬
乞假歸田君服闋後即請假養親朝夕奉侍左
右潔養無方三十年如一日也君天性誠孝為
人安詳謹飭謙以待人和以處衆積學好古手

不釋卷中年多病究心衛養之術晚歲日課首
楞嚴咒與畫禪寺主佛公重刻天如禪師楞嚴
會解以証明心見性之業道光九年九月偶患
腹疾不決旬竟不起臨終請尊勝亮公領衆念
佛溘然而化殆以多生福德暫來住世以了夙
緣者與子二遵祁希甫皆早歲遊於庠讀書紹
承祖父之業榕舉先生以西河之痛屬予為傳
以垂家乘因敘其本末如此

節婦張宜人傳

節婦張宜人上海封君王公世祿之配也生長

清門既筭歸於王君七年而喪所天上有姑沈氏下有二子長文源纔四歲次文瑞甫一歲仰事俯育宜人一身肩之當封君之世家綦貧及沒貰一棺直五千無以償又貸人藥餌資銀二兩宜人日紡木綿十二兩易錢五十饘粥之餘投一器貯之積二年逋悉償姑歿殯殮之資無所措封君有從兄熙如稍稍贊飲之二子稍長熙如謀各令習于藝宜人仍以紡績佐之二子勤力作生事稍充裕宜人令先卜葬三世喪然後各授室既又築祠奉祀先世栗主並瘞三族

人之未葬者八棺其知禮義識大體如此天性
慈惠方窮居時有隣婦貧病無所依宜人日侍
飲食躬為澣濯人以為難家既饒自奉儉約而
於戚里敦任卹之誼雖老猶理家政井井然課
孫讀書有遊庠序者嘉慶十八年有司以其事
請于

朝旌表如律令以子貴封宜人凡守節五十七
年而卒春秋八十有四嗚呼當封君初歿時家
徒四壁衣食之計蕭然宜人乃克勤克儉送往
事居及見二子皆成立孫曾滿前壽登大耄康

強逢吉天之報施何如耶是可為巾幗中之完人矣因為之傳俾附王氏家乘以為當世矜式焉

女史湯蘭仙小傳

湯坤字同生一字蘭仙吳人生長儒家父鉤為太學上舍生蘭仙生而明慧稍長頎頎玉立容貌昳麗親戚見者謂為神仙中人生時母氏陸太君夢至一境芳蘭遍地香氣襲人採一莖以歸既寤而女生因字之曰蘭仙云蘭仙為父母鍾愛幼作男子裝隨兄入家塾讀書一再過即

成誦覆之無遺忘年十六喪父家無餘畜蘭仙
奉母孝且敬每日夕刺繡易百錢以供甘旨以
為常二十四歸同里沈生伯鑒生遊公卿閒司
記室家食之日少蘭仙能事其姑得歡心常謂
生曰人生百年如一瞬離別之感人情所不免
然古人負米養親不遠數百里食貧之士安能
長相守耶老母在堂吾當代盡子職勿係遠人
念也歸生三載有身嘗焚香籲天曰此生不願
富貴但願得一賢良子足矣又嘗謂生曰幸而
得男吾當親課之設有餘貲購書數萬卷藏諸

一室晨夕披覽其中人生何樂如之其所志如此素有咯血之疾體羸弱不勝勞既免身而疾作又為庸醫所誤遂不起生平愛畫蘭無師授而風枝露葉綽有餘妍其中有風因焉先是嘗夢至一處泉石幽眇庭宇清曠非復人間世有好女子三五輩肅之入求作畫其後頻頻夢見其地臨化云彼處有人來迎殆古人所云其生也有自來其去也有所歸者耶子與生習恐傷奉倩之神為之作小傳以抒其悲

大悲菩薩頌

西方大士第一圓通以大悲心而成佛道衆生
昏迷沈淪慾海因慾生愛若繭纏身菩薩威靈
說清淨法斷除一切脫離苦海如大願船普度
衆生無聖無凡同登覺路

顏魯公畫象贊

平原太守天性貞亮力保危城中原一障晚歲
陷賊困於奸相致命遂志忠臣之樣

王文成畫象贊

穆穆文成胸羅衆有立德立功言亦不朽道闡
良知威清羣醜一代偉人古今無耦

蔣忠烈公像贊

公諱若來字龍江長洲人崇禎聞以武功起家官至總兵守金華城陷自頸死
乾隆四十一年追謚忠烈

明政不綱萑苻蜂起孰為渠魁曰張與李二寇
所至巢傾卵毀蹂躪江淮四郊多壘矯矯蔣公
國之虎臣披堅執銳賁育其倫矢穿七札弓開
六鈞誓死封疆不顧其身皖江之濱孤城如斗
危若累棊唯公能守總統鷹揚芟夷戎醜賊鋒
大摧踉蹌遁走天厭明德啟佑

聖皇蕩寇收京日月重光六師南來我武維揚
摧枯拉朽明社以亡吳越千里我征聿至萬衆
歸心壺漿箪食士卒鳧藻公心不貳茹刃如飴
致命遂志

興朝教忠不遺殷頑忠烈通謚公列其閒睢陽
之張常山之顏古今相望毅魄同班公之女孫
于歸我室葭莩相聯熟公遺烈闡幽顯微惇史
之職載筆揚徽壽諸竹帛

葉樗菴像贊

藹藹葉公循良夙聞為

君司牧善政宜人民懷慈父吏畏神君公餘有
暇翰墨怡神彈琴詠風萬卷橫陳游心六法倪
黃逼真昔在京華曾接芳塵今瞻畫像道範長
存雲烟過眼邱壑置身愛而不見我思孔殷

張友樵像贊

世閒萬事風輪疾走惟道集虛可以永久維彼
哲人仙心聖手腹有詩書胸無塵垢樹德鄉閭
養真林藪以墨作稼與樵為友松下一廬桑閒
十畝離羣獨立超然無耦

竹菴和尚畫象頌

浙西禾興郡有寺曰楞嚴昔有紫柏師於此卓錫住結集經論律創立支那藏梵筴易方冊大教易流傳其後百餘年法席無人繼寶藏既零落正法遂淪夷竹菴有德士至此作住持佛土既莊嚴經坊重建立闡揚法王法法會遂中興乃召良畫師自願慈悲相此身非色身亦不離色身一點常寂光徧照十方界

宣和硯銘硯為涿州馮氏快雪堂故物

宣和硯御府珎歸涿鹿非其人七百年如轉輪
今吾與汝結為鄰

方竹丈銘

虛其心堅其節直方其德吾老矣以汝杖于國

顧竹坡誄

夫何少微之星隕兮又武擔之山折嗟老成人
之彫謝兮當龍蛇之運厄椿蔭條其摧殘兮鵲
音悲而嗚咽瞻總障之虛懸兮對鼎鑊之空設
稽先生之世系兮從韋顧以發源秉英姿於紫
宙兮承華胄於黃門守詩書之彝訓兮誦貞孝
之清芬追長風於先哲兮遺餘慶於後昆初筮
仕於神州兮贊經綸於大府旋綰符於吳越兮

克追蹤於卓魯萬物被其仁風兮百穀仰其膏
雨慕宏景之桂冠兮效淵明之解組循聲著於
仕路兮令望表於州閭守故家之遺籍兮新先
人之敝廬捐圭田以潤族兮築高閣以藏書集
名賢之遺像兮稽古人而與居胡昊天之不弔
兮嗟哲人之長逝乘白雲而遄歸兮厭紅塵而
永棄幸盛德之在人兮貽令名以垂世羌援毫
以摛辭兮尚臨風以揮淚

故宮保劉公墓志銘

有序

道光十年正月初九日故宮保萍鄉劉公沒于

揚州子舍其夏孤子元齡等奉其喪歸江西過
吳門乞幽宅之銘因憶公嘗謂予曰我兩人締
交五十年所謂厯窮達死生而不變者也他日
君先逝吾當銘君吾先逝君當為我銘追思疇
昔言猶在耳乃今公先歸道山予雖不文敢忘
宿諾按狀公諱鳳誥字丞牧號金門先世由安
福遷萍鄉高祖瑞貞

國初請免闔邑南糧當時呼為劉善人事載志
乘積善餘慶此其始基矣曾祖易琯祖經濟父
大智世守儒業三世皆以公貴兄弟三人公最

少生而穎悟絕人鄉黨尊宿皆異之年十五入
萍鄉縣學督學使者為吾鄉蔣時菴先生於衆
裏目色公卜其為非常材攜之入京及致仕歸
又攜至吳門切磋者兩載歸應乾隆己亥科鄉
試遂中式五試春官於己酉成進士

殿試一甲三名及第授翰林院編修辛亥大考
翰詹公以優等升翰林院侍讀學士壬子授廣
西學政任滿回京嘉慶丙辰派教習庶吉士是
年冬丁父艱己未服闋進京值

睿皇帝親政之初夙知公名簡充日講官

起居注纂修

純皇帝實錄兼

咸安宮總裁庚寅充湖北鄉試正考官辛酉兼
署國子監祭酒旋擢太常卿奉

特旨仍帶講官蓋

帝心簡在久矣是秋典山東鄉試即授山東學
政在任一遷內閣學士兼禮部侍郎再遷兵部
侍郎甲子七月任將滿有

旨內召充

實錄館副總裁專司進呈稿本又充

經筵講官

文淵閣直閣事其冬因事左遷仍補內閣學士
丙寅六月升兵部侍郎又調吏部侍郎兼辦
國朝宮史續編丁卯四月

純皇帝實錄告成

賞加太子少保七月充江南正考官旋授浙江
學政浙江本文人淵數公以鼓舞人才為已任
每得一嘉士即送會城書院肄業時時與之講
習古學士心日奮士氣日親己巳秋浙江鄉試
適巡撫阮公元因勦捕海寇公出奏請以公代

辦監臨事乃有徐余二生聯號舞弊公未及覺
察事發被議奉

旨發往黑龍江効力癸酉

恩釋回籍戊寅六月

特旨以編修起用未幾患目疾庚辰七月

睿皇帝升遐於熱河避暑山莊公在京聞信悲
感異於常人目疾益劇遂於次年夏請假南回
以幼子元喜需次兩淮遂挈家赴揚州就養道
光十年正月初九日以疾終距生於乾隆二十
六年春秋七十公一生以文章報

國乾隆庚戌歲

純皇帝八旬萬壽公撰進頌冊奉

召詣乾清門傳

旨獎勵并傳

聖諭有江西大器之語嗣後疊掌文衡累膺著作之任寔基於此辛酉之春

睿皇帝祇謁

裕陵公寔扈從方

駐蹕桃花寺接到軍營捷報

命增入上

陵祝文公立成二聯進呈

上嘉其敏速公之典試視學所取文必以根柢
六經為主故所得多積學博古之士其掇巍科
膺上第蜚聲館閣者不可勝數尤以扶持名教
為先務在山東時會同巡撫題請為伏生之後
設博士一員又議及左邱明鄭康成雖格於部
議而公表章經術孜孜不怠之心可以概見公
於庚子會試卷在編修邱公庭濠房中薦而未
中公感知遇之恩執禮唯謹後邱公沒於黑龍
江適公同在戍所經理其喪送之歸其惇尚風

誼如此公於書無所不窺尤深於史學南昌彭文勤公有補注歐陽五代史之稿未及成書臨終以草本及所采宋人書二百餘種盡以付公屬為續成公排比搜輯厯二十寒暑晚歲始萃錄成編梓行于世可謂不負所托矣所著有經進文八卷駢體文二卷古文四卷古今體詩六卷館課詩賦五卷集古詩三卷藏于家余與公同歲舉於鄉因得獲交于公知公最深因諸孤之請乃敘其生平本末如此配李氏故廣東巡撫恭毅公之女封一品夫人子八元齡官江蘇

吳江縣知縣元恩道光辛巳科舉人元喜兩淮
候補運判餘俱先卒孫六震浙江候補運副咸
孚願壯觀俱未仕曾孫二九疇九韶孤子元齡
等於某年某月某日葬公於某原予衰年不能
遠涉會葬乃先期作志且為之銘其詞曰
彭城華冑著在漢京惟歆與向經術修明哲人
相望歷二千齡萬生我公大振家聲初登館閣
傾動公卿黼黻

皇猷翊贊隆乎燃藜秘閣珥筆

明廷燕許手筆萬衆心傾伯夷典禮呂伋掌兵

總持著作載佐銓衡輜軒四出網羅俊英纖塵
弗點虛堂鏡明君子豹變履險亦亨鴻文壽世
春麗鯨鏗不懈及古班揚抗行英文妙墨模楷
後生大江之濱鬱鬱佳城卜云其吉山高水清
左林右泉是經是營子孫無斁長享利貞

俞封君墓表

易曰積善之家必有余慶夫人脩身踐行制節
謹度以教養其子弟鄉黨稱爲善人則天之報
施若可操券而待非人欲責報於天也積厚者
流光其理固如是若封君俞公之事可述焉公

諱世隆字盛初甘肅寧夏人其後移家平羅公
少有至性孝於其親讀書通大義弱冠而孤生
計支絀乃慨然曰學者以治生為急吾安可鬱
鬱久居於此遂棄儒業而服賈於平羅平羅距
寧夏百里而遙公慮定省之或有關也因迎母
杜安人就養焉平居慎交游以信義自重取與
無所苟言動必依禮法見人有過輒面規之人
多憚其古直亦未嘗不肅然起敬配唐氏繼配
赫氏皆淑慎宜家克佐內政赫宜人有丈夫子
五人長德涵次德淵次德源次德洵次德清公

之教諸子也必以義方自童稚以至成人不少
假借雖尋常起居尊卑長幼之禮秩然不令纖
毫有失嘗謂古人多男必各授之以業故令德
淵德洵力於學而令德涵德源力田治生嘉慶
丁卯德淵舉於鄉丁丑成進士選庶吉士改知
縣歷宰荆溪長洲二邑遷蘇州府督糧同知德
涵以弟官封文林郎德洵亦補寧夏縣學廩膳
生弟兄濟美堂構一新若文言所云積善餘慶
者此其徵與當道光三年吳中歲祲維時德淵
方宰長洲請於上官緩催科之令蠲賑兼施復

出私財為邦人倡以助夫官賑之不足貧民賴以存活者數萬人大府舉荒政之善首及之以告於

朝晉秩五品他如文廟歲久朽敗則捐俸葺之祭器未備則捐俸置之歲當賓興擇諸生之嚮學者助其資斧凡所設施有古循吏之風識者知其本諸平時庭誥云封君生於乾隆九年沒於嘉慶十五年春秋六十有七元配唐宜人先卒繼配赫宜人後公十五年而卒德淵方晉階貳守未赴任聞赫宜人之訃銜恤西歸將奉宜

人之靈合葬於先封君之墓以狀徵誅惟是封君葬有年矣未及志其幽宅乃為敘述其生平大畧立表墓門俾鄉人有所矜式焉

沈處士墓表

嗚呼此震澤處士沈君之墓君沒於道光八年七月初九日既卒哭孤子寶禾等以狀來告曰先君吉葬有期矣不肖兄弟不能有所成立以光大先君之業惟先君忠信篤敬無聞於人言恐碩德懿行湮沒無聞則不肖等罪戾益深願公為表墓之文以信今而傳於後世寶禾游於

吾門也久予與君有通家之誼習聞其生平行
誼辱承其請不敢辭按狀君諱洽霖字宗海號
藝圃幼本名江後出為從父豹後改名邦榮既
為太學生又改今名先世出明副使啓之後祖
守義父光珠皆以儒業世其家伯兄汝霖官徽
州府訓導仲沽霖官寧國府訓導君其季也少
孤依兩兄以成立讀書通大義游於童子科不
售輒棄科舉業有四方之志維時舅氏王公曾
翼觀察西寧君往依之乾隆甲辰歲甘肅回民
田五作亂薄蘭州君隨太守張公燮憑城固守

晝夜弗懈時觀察王公方治戎務倚君如左右
手君左纛韃右纛筆馳馬上下峻坂如飛觀者
皆心異其能賊平歸家省母橐中裝千金以補
頻年家人薪水之費不以自私也性孝友兩兄
常宦游於外君主持家政無私財生子六人課
以儒業長寶禾次毓秀次毓和次毓馨皆博士
弟子其幼者毓椿毓松亦業儒孫四熊師燕侯
羔卿驛臣君配孫氏克勤克儉相夫教子以閑
其家先卒孤子寶禾等將於道光某年月合葬
於某阡爰表諸樂石以示方來

張君墓志銘 并序

縣有令古諸侯之職也天子付以司牧之任有分土有分民此非奇材異能之人可以勝任而愉快必得恂懽無華之士休養生息日計不足月計有餘庶幾成古循吏之治焉若餘杭令張君非其選與君諱吉安字廸民號蔣塘吳縣人清門令德世守儒業曾祖某國子生祖某乾隆壬申恩科舉人父某以君貴封文林郎君少穎悟讀書習科舉之業兼工詩善書乾隆丁酉年十九舉順天鄉試乙卯以大挑一等分發浙江

以知縣用應署淳安象山新城永康麗水浦江
所至有聲補餘杭至嘉慶己巳因親老思鄉土
遂引疾歸君之為政一以慈惠為本不沽名不
喜事與民相安而事無不舉初任淳安仰海忠
介之風以廉節自厲賦詩見志其在象山地瀕
大海民俗強悍且其時海氛未靖督師者獲洋
盜即付縣勘訊積至二十餘案獄囚數百人君
一一虛心研鞫無枉無縱盜風亦熄其在永康
蛟水陡發田廬蕩析君設厰棲流煮粥以食餓
者收葬浮屍凡所設施雖請於上官皆不待報

而徑行上官亦鑑其誠而嘉許之其在麗水適逢大旱君設壇於郊率士民虔禱三日而大雨霑足百姓歡喜鼓舞以為皆都君誠感所致其在餘杭最久縣俗素健訟君終日坐堂皇聽訟如與家人語必得其情而後已民既悅服案牘亦清君既歸田餘杭人猶歲時踵門起居不紀也君常兩為浙闈同考官所得皆知名士君既歸尋丁外艱服闋後以繼母在堂遂終養不復起君為人孝於父母友於兄弟信於朋友終其身如一日配王孺人鴻案相莊白頭偕老子三

長光熊次某次某各授以業皆敦厚醇謹守其
家法孫三某某君生於乾隆二十四年卒於
道光九年春秋七十有一孤子光熊等將于十
年九月十一日葬公於吳縣珠圓山之原先期
乞表墓之文乃揭其崖略如此且為之銘曰

聖門論政先善人官既慈惠民必親清河賢人
召杜倫讀書稽古師良循仁風所被萬物春四
境以內無冤民虛堂明鏡絕垢塵絃歌三徑安
其貧佳城鬱鬱宰木新哲人御辨歸其真清風
亮節虞沉淪特書崖略鐫貞珉

威勤公事略

公諱勒保姓費莫氏滿洲鑲紅旗人祖某父溫福及公三世皆官

武英殿大學士公生而智慧絕人少多病十二歲始就外塾讀書年十七經義已通應乾隆丙子科順天鄉試不中改習清文考中筆帖式補中書科文忠公傅恆賞其才挑入軍機處行走升歸化城同知權絳州事時溫公出師金川沒於木果木之難公丁父艱回旗補兵部主事升員外郎尚書福隆安倚如左右手兼掌四司印

鑰仍充軍機章京乾隆丁酉京察一等大學士
高晉方總督兩江入覲覲公在軍機處言事明
辨詢知姓名請於

上遂簡授安徽廬鳳道己亥在任丁母憂高公
奏請留公在江蘇辦理庚子

南巡大差奉

硃批何必開此例可用覈尚有耳公遂由水路
扶柩回京行至山東於舟次接奉

廷寄因俄羅斯方開市授公為庫倫辦事大臣
諭令不必赴

行在請訓迨至京向留京大臣阿桂問明開市
事宜卽行赴任並因公有代繳溫公官項未清
命授以銀庫郎中於應得養廉內每年坐扣銀
二千兩呈繳歸官餘銀三千兩留爲當差之用
公至庫倫經理一切邊務悉合機宜遷太常寺
卿

賞戴花翎凡在庫倫八年商夷悅服其地無廨
宇公教蒙古匠人斲木造屋以代穹廬埴土爲
坑燃以薪由內地攜鴨卵雞卵就熱坑伏之生
雛長養以充饌又編柳枝爲筐實以土投蔬菜

之種沃水而烘之皆萌芽長發由是有蔬食其
地水中多魚蒙古人不解捕公命家人結網以
漁煇人乃給于鮮蓋公自知為

上所任故為此久安之計也丁未

上授公為兵部侍郎纔一年簡授山西巡撫又
一年升署陝甘總督公在甘肅十年時甘省兩
經回人之變又以監糧大獄之後官民交困公
到任後體察衆情休養而安息之吏治民生漸
有起色然邊境土瘠民貧陝甘二省歲賦積逋
至四百萬公於甲寅歲入覲請於

上而除之其回任兩省白叟黃童迎於道中千里不絕六十年奉

旨赴楚南苗疆協辦軍務嘉慶元年調雲貴總督勦捕猺黑未竣事移師勦貴州小竹山教匪又移師勦湖北黃柏山教匪二年貴州狝苗韋七綰湏謀娶苗女王囊仙煽播妖言糾衆滋事據關嶺普坪為門戶擾及南籠

上命公率師往勦公至即解南籠之圍而關嶺地極險峻兩山夾峙其上苗寨林立中通一線之路十五里所謂一夫當關萬夫莫開者也公

欲進兵翼長常明持攻心之說遣人往諭之苗人不愛撫且肆嫚語公不知也有守備田朝貴以其事聞於公公遂檄翼長進兵翼長持不可公怒曰微翼長吾豈不用兵乎立傳號令點集兵丁定於八月十五夜發兵是夕天大雨如注將士袴褶皆濕公心方懊惱豈知苗人以中秋佳節且雨不設備官兵入關嶺若無人焉者兵既出險天大霧萬里無雲月明如晝公大喜督兵如牆而進圍洞洒賊巢鎗礮並發苗人始驚覺請降公斥曰早不降今兵已合圍乃欲降不

可信也公坐坡上督兵四面環而攻之擲火彈焚其寨寨中火起哭聲震天王囊仙毀柵竄出總兵永寧生擒之并於當丈賊巢搜得七絡湏解京正法

上嘉公之功封一等威勤侯別有巴林苗人王抱羊與王囊仙同叛公又移兵殲除之狎苗平公赴雲南總督任其時川楚白蓮教妖人作亂陝甘總督宜綿統兵勦之日久不能平

上命公代宜綿總統軍務公遂入蜀尋調四川總督維時教匪共有十號賊首四十餘人彼此

不相統屬四路焚掠蔓延四川陝西甘肅湖北
河南五省公至蜀申明節制痛飭軍營積弊將
弁知警漸有奮勇出力者王三槐者東鄉白號
之賊也與同號賊冷天祿盤踞安樂坪有貢生
劉星渠與三槐素識東鄉令劉清令星渠招撫
之三槐偕星渠詣大營請降公諭令呈繳鎗炮
器械并將賊衆花名造冊呈覽以憑遣散安插
三槐雖受撫而冷天祿不從往返再三迄無成
說公憲其反覆遂執三槐解京

上嘉公之功晉封一等威勤公時嘉慶三年八

月事也四年春

睿皇帝親政授公經略大臣總統五省軍務公受

命駐劄達州居中調度有副都統福寧者在達州辦理糧餉其人往時曾任甘肅布政使與公積有嫌隙是時蜚語入告

上震怒以威勇侯額勒登保代公為經略吏部尚書魁倫為四川總督將公逮問治罪魁倫遂坐公失機擬斬請即在成都正法

上以為罪不至此

命解交刑部公既去蜀而蜀中軍務無主賊乘間復熾額侯與魁督不相能是冬額在南江勦賊失利寄信與魁索餉魁謂川北路梗不能通必先肅清運道然後餉可往額於是大愠謂陝省賊情緊急遂悉統精銳之師過陝而以老弱四千人付魁接辦川中殘匪魁不察賊勢輕重於五年元日接受其事遽領兵欲行有侍衛春寧方在達城養傷謂魁曰此等疲兵如何殺賊往即潰矣魁始有懼心因在達州城外十五里之雷音鋪駐師十三日檄調總兵朱射斗之兵

為前敵及朱至於正月十四日啟行而賊已於是日由定遠石坂沱偷渡嘉陵江擾及川西矣朱射斗追賊及之於蓬溪乘夜進兵陷入賊中後隊提督百祥不及援朱遂陣亡魁本不能軍及朱亡益失所倚遂退守潼川河潼川縣亘千餘里兵分見單不能守賊至南充欲渡無船射洪縣之太和鎮臨河與南充遙遙相望維時射洪令符元魁方禁渡而劉清於時已升道負帶領鄉勇五百人至河干防守南充難民呼號求渡劉曾任南充憫其民放江船三十號接引過

河不意賊匪混跡其中是夜即在太和鎮放火
殺人此地居人未經兵火猝聞賊至驚竄四散
賊遂全夥渡河矣其時渡河之賊共有五股通
江藍號冉添元達州青號徐添得太平黃號徐
萬富奉節線號陳得倖襄陽黃號樊人傑雷士
旺等擁衆數萬人川西州縣皆被焚掠直擾至
金堂成都戒嚴事聞

上始知公前此治戎無悞遂釋其罪賞給藍翎
侍衛仍

命赴蜀督師時川中已經叅贊將軍德楞泰於

馬蹄岡將冉添元臨陳生擒餘匪仍回川北公
至撫輯被賊州縣分設兵勇防守嘉陵江川西
南由此無事公再至川後兩年中厯署提督將
軍最後實授總督而事權始歸于一其閒漸加
四品三品二品頂帶至六年冬公督兵於川北
盧家灣生擒賊首冉學勝然後復一品頂帶封
男爵世襲徐添得者蜀中倡亂之賊也六年秋
閒叅贊德楞泰在湖北殲其弟徐添春悞以為
添得遂入告并傳首達州亭子鋪起事地方梟
示七年春總兵田朝貴生擒徐添得解送大營

訊寔無訛公曰叅贊大臣所殺賊尚涉於虛天下人聞之必以為口實毋乃有傷國體乃將其人凌遲處死而不以入奏由是額德二帥皆以公為識大體不與人爭勝從此一切和衷集事矣八年冬賊平凱旋公在蜀十三年其後有知縣某耽酒廢事公叅革委負接替某匿印不與公怒而遣武弁往執之又省城錦江書院肄業生員有聚賭者公至院課諸生知其事當時斥其人加以杖責又資州小試童生罷考公查出為首者置諸法於是相傳公細知縣打秀才殺

童生造成蜀都賦一篇傳聞入京

上欽差大臣往詢皆有其事而未嘗枉法也

上不之罪尋召為尚書晉大學士因事革去十六年簡任兩江總督秋

內召仍授

武英殿大學士總理吏部未幾公以兩目失明致仕年八十而卒卒之日口授遺疏及處分家事畢告諸子曰吾將以今日午時長往衣冠扶至中堂及午奄然而逝公既沒奏聞有

旨晉封一等侯照例給予卹典

命

皇四子往奠茶酒謚曰文襄子英惠襲三等侯
予在蜀戎幕日夕侍公得公生平最悉公於
國史當有傳而未必能纖悉具備故序其事略
如此俾其子孫有所考焉

餘杭縣張君事狀

君諱吉安字迪民號蒔塘吳縣人祖鵬乾隆壬
申

恩科舉人不樂仕進以名孝廉教授里中一時
名士皆出其門學者稱為楚門先生考主茂讀

書厲行不治生產家以中落君少穎悟紹承家
學早工科舉之業工詩善書年十七即游京師
時嚴愛亭陳永齋兩先生方在詞館皆楚門先
生門下士君因從之游故學問文章俱有根源
乾隆丁酉舉順天鄉試座主為梁文定公阿文
恪公房考為涪州周東屏先生時君年方十九
識者皆以大器期之會試屢薦不售久客都下
藉館穀以自給乙卯大挑分發浙江以知縣用
君以家貧親老急于祿養遂之官時秦小峴司
寇方觀察浙西與君素不相識一見獨器君游

揚于大府之前為他年循吏儒林必兩兼之以
是每遇劇邑需才必首及君而君輒辭勿就上
臺亦勿之強也是時浙中清查倉庫方重彌補
同官往往以此見長君嘗力言於大吏之前謂
清查既核有確數已可杜其續虧當此大法小
廉宜與民休養生息為急務此無形之彌補寔
有益于治道如以彌補多寡為優劣恐風氣所
趨必人人以掊克為事非為國保民之道上官
雖聽其言而亦不能用也嘉慶丁巳署篆淳安
明海忠介曾宰是邑君喜筮仕之初幸得前賢

舊治下車日首謁忠介祠賦詩見志其為政也
不沽名不喜事與民相安而事無不舉是秋調
署象山地瀕大海民俗強悍時海氛未靖閩浙
舟師連檣寄碇於縣屬之石浦地方君廼力懲
海濱剽悍之俗終君之任邑人無通盜濟匪之
事舟師在洋獲盜即移縣勘訊不數月多至二
十餘案犯衆至數百人君一一親鞠無枉無縱
盜亦漸弭其年風潮傷禾請緩秋賦以蘇民困
每以遺犯脫逃鑄級已未復原官即攝新城篆
時方治漕累民之弊悉除之民皆稱便雖在任

不久受替而其民至今尚有去思庚申春移任永康甫三月蛟水陡發田廬蕩析死者相枕藉同時被災有二十餘縣之多永康適當下游災最重向例勘詳待報始給撫卹君不拘成例先為之設廠棲流煮粥收養棹小舟多載餅餌以食就人全活甚衆撈浮屍厝義阡人以不遵成例恐致賠累為憲君則以救民為急不暇計也躬履危險寢食俱廢浙中前此偶有偏災不過撫卹蠲緩從未有給賑之事觀察某公臨縣執水荒一線之說民情洶洶不安賴君平時信於

民一言而解其時浙撫阮芸臺中丞素重君為人親履災區分別賑卹一如君議民心始安於是掩埋有資修房有費墾田有本籽種有糧賑卹並行不濫不遺又將應賑戶口銀米數目榜示通衢以杜胥吏侵欺之弊是役也自夏徂冬心力交瘁遂得腕痛之疾及瓜代有期大府慮新令與民未習仍委君一手經理賑務至次年三月展賑事竣始息肩旋省去之日百姓攀轅卧轍填塞道路焚香頂祝者至離縣數十里不絕有泣下者是年夏處郡大旱麗水尤甚大府

以君素為士民悅服遂委攝麗水下車之日步
禱于神甘雨大沛秋獲豐收民安其業緩於催
科勤於撫字賦無缺額百廢俱興其間創建文
昌宮脩葺秦淮海祠衆情踴躍民忘其勞壬戌
夏久旱不雨地處萬山之中無水可引秋禾將
槁聞永嘉貢生童君有禱雨之術專价往迎之
君茹素虔禱憂形于色童謂旱象已成惟君愛
民若是宜可感召禱不三日大雨沾足轉歉為
豐麗邑萬山環抱土瘠民貧官斯土者戚戚如
遷謫而君獨喜其人情淳樸政有餘閒故宦游

之作惟在麗邑獨多癸亥春改署浦江時浦邑連被水旱君力任救荒之事運米浙西減價平糴凡不逞之徒藉災擾累良民者嚴繩之災黎無告者恩撫之不兩月二麥有收四境帖然人咸以君實心實政有以感召天和也是冬補授餘杭縣餘杭去本籍近君養親官舍極天倫之樂縣俗健訟君日坐堂皇自辰及暮開心見誠隨事化導懲其訟師數人不數月威信大彰積牘一清教士養民至周且備修河堤以護農田葺學校以興文教廣延名宿編輯邑志表彰節

烈以厲風俗甲子夏雨損禾設藏平糶乙丑春
雨為災分鄉煮賑濟貧保富邑人大康縣境多
山民藉竹筍之利每有盜掘者民甚苦之君設
法禁絕邑多名跡次第脩復接引士人洞悉民
隱久而訟庭若水君自題楹聯云不沽名敢不
顧名斯言可佩無廢事亦無喜事我職當脩可
以見君之為政矣有時因公赴鄉不攜僕從乘
山輿坐僧房蔬食布被君自忘其為官民亦忘
其為官也甲子丁卯兩為浙闈同考官多得知
名士餘杭當天目下游萬山之水皆匯于邑之

南湖泥沙停淤湖底日淺君相度地勢方欲召
匠燒埽使泥去湖深為水旱之備而其時封公
年高頓思鄉土君乃於己巳秋引疾去官奉親
歸里未竟其事民甚惜之去之日士民奔走攀
戀如去永康時是冬封翁即世居喪哀毀如孺
子以繼母年高遂無出山之志家居養母十有
餘年道光丁亥冬太夫人以壽終君年已七十
白首擔呼哀如所生從此精力頓衰戊子十二
月二十八日太夫人小祥君感傷而病至正月
初三日卯時遂卒春秋七十有一君天性純孝

篤于友愛自奉儉約食無兼味一敝裘至數十年而理所當為者雖多金不惜君宦歸卜宅盤溪以老屋讓弟獨居周卹親族必盡其力族有節婦皆為表揚停棺未葬為之卜地弟婦先沒遺命為之營葬妹適吳氏貧而寡歲時饋問不絕君清操自守餘俸無多不足以供饘粥故其初歸即令諸子各謀其生自乃節衣縮食以敦任卹之誼此豈常情所能及哉沒之前一日題詩贈淡雲和尚手書于軸筆力蒼勁不減平時自製挽句云宿世不忘貧衲相十年有負宰官

身臨終端坐而逝神明不亂其來去了無挂碍
知其生有自來其去有所歸矣予與君締交五
十年熟知生平本末故敘述其事以俟當世立
言者採擇焉

補遺

阿育王傳序

昔如來遇德勝小兒弄土為戲見佛三十二種
莊嚴妙相遂掬倉中之土以奉世尊是小兒者
以是因緣得為轉輪聖王即阿育王是也其後
佛滅度於雙樹下其徒以彼家法荼毘之收得

舍利三斛阿育王運其神力一夕造八萬四千
塔一塔一舍利散布十方世界而為供養其在
中國者寧波阿育王祠所藏舍利塔是其一也
阿育王之父為頻頭莎羅王母為婆羅門女阿
育王初任殘殺其後深信三寶得証善果則所
謂放下屠刀立地成佛者也此阿育王傳出釋
藏中西晉時三藏法師安法欽所譯嘉慶乙亥
刻於吳門虎邱小普陀主僧秉戒屬予為序予
觀其卷首已有金華宋學士之序矣可無贅言
惟是予往遊于鄞曾至阿育王祠瞻禮舍利塔

親見舍利金色光明當時贊歎至人現化不可思議今又得此傳具詳阿育王奉佛始末因緣相生不可以無言也因允乘戒之請而作後序

憶秋館詩序

善乎陸士衡之論文也曰詩緣情而綺靡蓋詩之為教必發乎情而止乎禮義然後溫柔敦厚之旨抑揚反覆其感人也易入是固非矜心躁氣所可襲而取也汪氏允莊以憶秋館詩一帙示余其詩為婁東顧君叔度所作予展卷讀之其旨遠其詞文上接武于齊梁下擷芳於溫李

無世俗叫囂之習鹵莽之氣颯颯乎有古風人之遺音焉夫詩教之流傳也凡經數變自有宋蘇黃二公崛起以沈博絕麗之才運以磊落英多之氣將欲驅使六經囊括百家此固極風雅之變而古人溫柔敦厚之意蕩然無存矣元遺山滄海橫流之歎良有以也今顧君所作斂成就法躁釋矜平讀其詩不知其情之生文與抑文之生情也質諸古人溫柔敦厚之旨殆庶幾焉余未稔君生平然聞君向游於頤道先生之門獲其緒論為多始知操觚一事必有師傳辨

齊所在夫固非苟焉而已也